



康對山先生文集

第五冊

16  
2796  
5





16  
2796  
5

康對山先生文集卷之八

後學 同邑孫景烈孟揚選次  
長白瑪星阿景謙叅閱

王應槐兆三

邑後學耿性直伯正校張書紳公佩分校

何瑞雲卿

墓志

將仕郎河南南陽府學教授封翰林院檢討徵

仕郎王先生墓志銘

夫賢人長者流風餘韻可以敦薄俗起頑懦當道衰

昭和十九年  
六月二十八日  
購本



文弊之日其拯正開誘至不小也然往往莫之能及  
故禮義廢絀維常不張君子有憂焉海於是述王先  
生之行而納諸其墓王先生者鄆人也諱儒字友宗  
其先河南人仕高陵遂家不去子孫乃爲高陵人今  
有諱元亨者墓在高陵或卽始來者與其子孫皆不  
可考人第稱王大使家墓云元亨以後有三人繼祖  
繼容繼先然莫能詳所出元季兵起繼容繼先由秦  
嶺東行出關避兵而繼祖攜妻子渡渭入鄆匿居終  
南山中至明興始徙鄆城北街故子孫遂世世居鄆  
焉繼祖生克誠克誠生敬仁敬仁生琰讀書起家  
爲大寧長清知縣以廉直顯名卒於官生子鉉寬厚  
博大鄆人稱長者受高年爵年八十一卒配李氏生  
三子其長爲先生先生隆準奇頰目廣輔而背厚  
若負進退居止非禮不行年十五遊學山東於布衣  
蘇先生受蔡氏尚書三年盡得其學歸爲鄆學諸主  
成化辛卯舉陝西鄉試試禮部不第慨然憤曰吾長  
清公之元孫也昔長清公英英烈烈莫能舉進士蓋  
嘗命予曰是在爾小子矣今不舉異日何以報地下  
再試戊戌不第以乙榜遂爲保寧巴縣學教諭於是  
仰天歎曰嗟乎志士若是矣其命也夫其命也夫至



巴品第材質以爲教其子弟皆興行踴躍巴素黜科目至是連舉三人焉 治已酉復任祥符學教諭其教一視巴無損益居七年遷南陽府學教授教授三年以外艱歸遂不復仕云先生始仕巴時欲奉父母入蜀就養李夫人以道險弗往止奉高年公往居一年高年公還歲時伏臘及父母且日未嘗不東嚮泣拜甲辰關內大旱人相食先生以俸金子仲弟歸養父母召其宗族可來食者三十人於巴又推其餘令鄰里已之巴者貿易爲食已雖益困則益休然樂也在祥符日謂去鄜逾近可奉親來養乃數上書高年公弗許欲罷歸去高年公又不許故思慮浸淫至髮盡白及聞高年公喪痛恨擊面若不欲更生也故旣葬高年公事李夫人終身不易焉此其誠孝懇至者蓋何如也海曩遊京師見先生之門人皆深服先生之教嚴毅切至有古人循循之益各言其與先生送別時眷戀之事猶泣下沾臆其浹洽於人心者若此也此豈區區聲音笑貌可至邪 治甲子予拜先生於鄜時先生已受封爲檢討當母李夫人之喪悴悴感感不得聞其言論前年壬申予再如鄜拜先生望之休休乎其容洋洋乎其度也接其言淵乎其深粹



其理也曰此有道者古伏生戴公董生之流也乃吾  
身親見之乎宜其子孫彬彬然執禮而好義勤問而  
尚賢此其初有然矣踰年而先生卒蓋癸酉冬十月  
某日也先生雖嚴以自治而天性溫厚未嘗無所容  
中情澹然毋以富貴利祿少動諸子科第相接聲望  
相踵天下識與不識莫不欣異仰慕而先生如有所  
弗聞者居鄉日與故舊置酒高會洋洋而樂蓋有廣  
受之風焉配夫人劉氏封孺人生四男子長九思以  
庶吉士任翰林檢討文名才行聞於時爲上經筵講  
官纂修孝宗實錄成劉瑾用事同翰林諸公以未習  
時務出轉吏部主事遷員外郎郎中瑾下獄言者以  
有罪劾謫壽州同知會天變言者又劾詔以同知致  
仕歸次九叙甲子舉人九臯義官九峯戊辰進士河  
南道監察御史孫男子五人瀛癸酉舉人潭沐渭漢  
孫女子八人已嫁者二人鄜學生楊顯盤屋學生徐  
永圖婿也餘與曾孫女一人俱幼未聘九年月日葬  
鄜北六老巷之原先塋九思語予曰曩九思罷壽州  
會盜起不得行先君賜書開導以理懼九思有所情  
也及歸值舍弟九峯以病得告先君見九思來甚喜  
慰九思日日率諸弟以奉先君之歡雖卽已病先君



中無一留也乃再踰年先君卒矣其慟蓋何可言夫  
完德厚行閭巷固宜有之亦奚必尊官盛位然莫能  
一二數者蓋利欲所灼鮮有弗化者斯賢人君子世  
固所愛慕焉先君之行蓋可以睹矣其賜九思書曰  
蓋聞萋斐之讒詩人歎息流言之興聖人懼焉此天  
下古今萬世共聞睹也故曰衆口鑠金積毀消骨此  
非過語也其有見而言之也夫古之君子竭忠其主  
非有所不盡也脩身慎行其越人非不多也然卒以  
罹於讒是故屈原放而離騷興其辭悲婉憤厲讀之  
淪淪焉使人心悲泣下而小子何爲哉古曰弭謗莫  
如自脩此吾所嘗奉教於君子天地日月巍乎煥然  
仰而觀之俯而察之求無媿於斯斯已矣而又何惑  
焉夫賢者以一世之績成百世之名其道固有然矣  
小子將何爲哉其言理直而指明義精而引長若此  
故予得以著於篇詔後世焉銘曰云云

有明詩人邵晉夫墓志銘

世有懿寶天旣畀之於人又斲而藏之豈天無意於  
斯世邪抑局於其數雖天亦莫之何也予於邵晉夫  
之卒未嘗不歎天道之難忱焉夫福善而禍淫天之  
道也晉夫瑰奇靈異之才少年登高第矣乃今覲觀



者資之爲奇貨卒陷於晦塞不得施才於國家乃又使之不幸而死所謂斬而藏之非邪予將誌晉夫墓石而歎天道之難忱如此於乎天誠何心哉歟我懿寶俾之不究其事不永其年又孰爲而來又孰爲而歸於乎天誠何心哉晉夫諱昇上世蓋涇陽人也四世祖克禮始徙居鳳翔普潤里子孫世爲鳳翔人正德末又更爲朝陽里克禮生庭庭生賢賢生泰仕爲雲南馬龍驛丞配傅氏生晉夫父戶部員外郎伯宗配宜人沈氏生晉夫洎弟恒夫景并三妹焉 治癸亥冬予得告奉先太安人歸武功道經靈寶戶部公時滿靈寶教諭予往訪戶部公則出晉夫之作示予時晉夫方十三歲也雖英氣逼人而進退爾雅畧無嬉容予甚器之後四年丁卯果中陝西鄉試第一明年會試禮部既下第會太監劉瑾爲其姪求婚曰吾女必得名士大夫爭以福建戴大賓洎晉夫薦瑾曰吾關中人所婚惟邵生乃可卒以晉夫壻焉晉夫躑躅呼天百計求免弗得乃克自樹立畧不與一人通終日閉戶拊膺讀書而已後瑾伏誅天子以晉夫無所預事赦爲編民關中縉紳大夫莫不重以爲寃而晉夫洋洋粹粹曾無少動於中險夷不改寵辱不形



厥覲淵矣辛未戶部公卒晉夫哭泣之哀雖及終制一如始喪事沈宜人無所不盡其極日日俟候顏色稍有不悅則憂形於色鬢而後已孔子曰色難若晉夫非其人邪往歲予道過鳳翔晉夫數與予言皆殊有造詣予方以爲斯文之幸乃後十餘年沈宜人卒而晉夫哀傷成疾治葬舉事小大靡不自爲憂勞爲皆壯夫且難况晉夫乎嘉靖甲午七月十七日壬午不起矣由生 治辛亥十一月四日丙子享年四十四又四爾於乎傷哉予每以晉夫清癯簡靜後當長年乃若此間訃之日行道悲痛况所重乎晉夫讀書過

目不忘而精義畢會漢陂先生謂予曰邇會晉夫超詣若彼近之學者誠鮮其人蓋學不自得則矜肆作而實德荒與晉夫不相侔也若劉元勳畢汝勤秦藩張瓊曹士奇與景皆西土之名士也莫不咸感晉夫造就之力詩曰豈弟君子遐不作人言有豈弟之德乃能作人也所配淡氏無子沈宜人爲置二妾亦無子乃以党氏妹之子延正爲後又養表兄沈氏之女適朱本素於乎傷哉晉夫平日所著有文章若干篇詩若干首小大樂府若干闕詩大旨春秋會義大學衍義隨錄及補遺十七史抄節詩評日記若干卷晉



夫亦可以不死矣明年乙未正月二十一日壬午將  
葬栢林凹先塋從戶部公之兆予悲晉夫之生晦塞  
於昌時而流光於來世其弟能稱述潛德如有不及  
則天道亦難謂其終於無知也爲之銘曰維彼雍州  
名山大川毓靈發祥古多哲人奕世是光奄及有明  
晉夫以生其履不忒赫赫厥名敝於庶佞其直如繩  
考德究業萬夫之特靈耀弗常至道每嗇喪此懿寶  
維世之索轆轤其輪灼灼其文近覲若蹇後聞則芬  
栢林之凹云從先人陵谷可易茲封不磷後賢諦止  
爲有明詩人邵晉夫之墳

奉議大夫工部虞衡清吏司郎中致仕劉君墓

志銘

君諱汝靖字安之其先澄城人也有爲萬戶侯者不  
知幾世祖遷來居渭南故世爲渭南人高祖敬祖生  
儀國初舉賢良爲閩中簿生子鎬鎬生隆字文盛景  
泰庚午舉人官至濟寧知州配宜人任氏生君與兄  
汝寧而君少有異質見者莫不以爲奇君益危襟正  
色無所動成化乙酉濟寧公命從士人王寵受小學  
卽知洒掃應對之節濟寧公以爲可教也遂盡從寵  
所學比濟寧公罷歸渭南臨川伍先生至奇之以爲



渭南縣諸生明年考渭南諸生則考君置第一補廩膳由是君騰聲關輔間一時藩臬鉅公過皆求試之故聲益揚關輔士皆固以爲不如君也曩予見吏部尚書許公言爲御史時嘗以喜雨及明皇幾致刑措二論試君甚嘉此蓋其實事云然兩試甲午丁酉皆不利後浮梁戴先生來提學重以君文爲奇謂君必首舉鄉試明年庚子果中高第會試又屢不利乃思卒業太學益爲瓊臺邱先生京口費先生所稱許而又屢不利故至 治癸丑始舉進士猶有例得依親君歸甫三月以爲母任夫人旣不幸卒當承事濟寧公而濟寧公忽遘疾不起君哀毀踰禮聞者莫不傷之丙辰冬十月拜工部營繕司主事督脩通州倉廠兼收放張家灣磚廠料而二廠皆有中貴人兼轄十六衛官又習近京畿驕縱有素君居三年無敢梗者此固處有其道云爾予舊見邃菴先生通州改建磚廠記言君以舊廠去河五六里舟不能達磚至又顧車轉般每萬計費八十兩天下財力取之不遺錙銖而蒞事者則每制於法比牽於毀譽安常習怠以爲通患其有能深慮却顧爲斯人圖便安者蓋寡矣磚自始陶至輸所費已不貲又至轉般之苦萬磚所用



猶可當中人之產萬萬計之當若何以歲繼歲積而計之當若何予固以爲名言夫士以牽於毀譽不爲其當爲者何可勝道君之所爲與邃菴之所道安得使天下人人見之庶幾乎可以興懦而起武使民恆得錙銖之寬豈不快邪此後君轉都水主事奉命視荊州抽分滌弊正理毋所易借事竣價倍往昔戶部尚書以爲廉直爾尋陞營繕員外郎命脩秦簡王園能以禮裁抑使其國弗軼往度其昌言正誼詳見家傳中今聞之尚凜凜云還提督神木五廠尋又陞虞衡郎中提督盛甲廠未幾繼母史夫人卒君以憂歸免喪也爲緝事者言收繫錦衣獄正德丁卯五月獄成詔免爲庶人瑾旣誅始復虞衡郎中致仕徜徉爲樂纔八年爾而又痿痺不履明年乙亥夏四月庚戌卒矣生天順丁丑二月日春秋五十又九配王氏德宜於君君病以藥弗效割股進之得少甦及卒之前日又割以進人莫不歎其難然事雖不經亦可以見公所以處乎其內者有道也生男子四人女子一人皆早死惟時勉一人存生有二女子六月庚午將葬君辛市先塋之次時勉以狀來請銘云爲君所遺命於乎君英毅豪爽之氣由今觀之蓋寥乎無儔然亦



止如是豈非斯人之不幸彼僥倖污穢乖刺不道者方且指而議之謂君爲愚而其分何但堅白水火不相侔也又安知君之云何語曰富貴不能淫威武不能屈此之謂大丈夫此可以喻君矣君篤義樂善能急人之難渭南安生程生與長安趙生皆客死太學不能歸君爲置棺歸之至於成事此貴人所易忽忘故吾猶及之是以使人矧君之細矣甲戌冬暮予如渭南訪君望君顏色雖病猶如渥丹聽其言論侃然古今之際道術之指纖細曲盡益喜望君無恙乃歸而求諸已病者歷百數十人始得異方亟以寄君則先吾方三日逝矣豈非數之所定非人之能移哉於乎傷哉銘曰云云

奉直大夫通州知州張君墓志銘

君諱舜舉字邦獻別號東崖子家世武功人勝國時代有令人曾祖輻生顯宗讀書不仕爲縣啟蒙師子猶記其教法嚴肅爲近所未覩也生璠爲鄉飲賓以君貴贈承德郎配鄭氏榆社丞莊女也亦以君貴贈安人生君與其弟舜賢君天性穎悟不凡長爲縣學生科目文字所出必異先君子特愛敬之後果爲邃菴虎谷時敏所重 治甲子中鄉試高等以乙榜拜



太原縣學教諭教人有法諸生畏焉丁卯應聘爲順  
天同考最號得人已有鄭安人喪服除復麻城士  
大夫見其教法甚禮重君庚午復應聘爲四川同考  
所收皆名士尋陞儀封知縣政通人和蔚爲中州守  
令之望撫按以才堪於繁奏調內鄉聲稱日隆吏民  
益協薦論之疏後先相踵未幾封君卒乃以憂歸起  
復吏部時大興缺令部尚書殊難其人點名及君曰  
吾有良大興矣君處至繁之地若無事然京師人語  
曰天子愛民錫我良令大興廳事久廢壞至不能蔽  
風雨君請於上以官房爲前後堂輪奐之美甲於畿  
內公卿具以其賢卓絕於時值通州缺守遂陞君知  
通州通州去京三十里東南要路也中多貴人宦官  
凡事相涉有貴人者請謁不獲遂以誣罷君君慨然  
求歸詩酒之遊里閭之樂凡七閱年其心陶然非區  
區以仕爲膺者班也嘉靖庚寅三月丁巳病感寒不  
起由生成化丙戌月日春秋六十有五初娶徐氏卒  
無子繼娶王氏壽官鉞女也俱封安人亦先君卒生  
三男子長汝爲季汝明皆縣學生仲汝翼服家人業  
一女子嫁生員談文孫男子二善繼善性孫女子二  
幼未許聘又繼娶馬氏清豐簿萬衢女汝爲等將以



是年十二月庚申葬君於城北祖塋與徐王二安人  
合兆狀來請銘予與君殊厚義不可辭因記君大興  
事若審編之公惟醴泉解理常與君不避豪右毅然  
獨行爲民所悅服他無聞也其謙以居鄉廉以蒞職  
則士大夫之艱節若君何忤哉銘曰城北之阡熙熙  
延延同賁厥儷萬世是安子孫振振後不愧前詩書  
之裔武功是瞻君才偉卓蔚惟時賢位不並德壽胡  
亦然昭茲我銘倘爲世傳

南城兵馬司指揮馮公墓志銘

公諱義字時宜家世武功人也曾祖成生春春生內  
鄉丞諱寅惇德好學教人弗厭有古昔鄉先生之風  
焉海爲童子時實從內鄉公游是時內鄉公方仕宦  
歸餘祿猶物也而終日端坐聚徒爲教海待數年絕  
不見與人羣飲此其誼意豈但近世鮮見哉內鄉公  
配李氏生三子長曰仁李曰智其仲乃公也公生而  
篤厚長而克敏累舉不第治甲子歲貢上禮部海  
時承乏翰林與公日相往來有士人某者素陰毀公  
或又至面謾公公遇之一如罔有聞者後士人攬糧  
失利諸納戶執而聲訴矣與士人素厚者皆避不與  
士人言公聞之獨匍匐詣予酸淚雙下曰吾何忍其



對山文集 卷之八 三  
妻子之不能還與其身之就死無救也立券求予貸  
予方怨此士弗馴於義若是卑也乃因公之誼有哀  
心焉於是求所厚者得五十金子公公持以投納戶  
士人獲免焉公之行事其平生蓋多類此者古稱篤  
義畧怨犯而不校豈非斯人之徒哉正德丙子除南  
城兵馬副指揮卓有譽聞當塗者交相薦之行且遷  
矣公奮然曰仕者所以行其志也予雖然亦行其所  
志已矣今予老且倦矣若埃其至而後去則亦安知  
予之恒不異是也於是懇求歸焉吏部嘉之進公爲  
兵馬指揮特許其歸給執照使爲鄉人式焉歸後二  
年爲嘉靖甲申七月丙戌公忽以疾卒於正寢計其  
生正統己巳十一月壬午春秋七十有六配楊氏有  
婦德宜於公 治壬子十一月丁未先公卒生景泰  
辛未九月庚子年纔四十有二云生男子三人世泰  
世用世亨而世泰吏部聽選官四女子長適予兄淮  
次適徐愷又次適郭某某死值予嫂亦死後繼歸予  
兄焉季適黨某有孫男子幾人孫女子幾人其裔盛  
矣繼配某氏無出世泰等以予知公濼宜以銘公之  
墓於是繫之辭曰生也好義歿也允賁子孫克世公  
乎何累



祭文

祭栗文

維嘉靖八年己丑十一月二十七日己未父潯西老人以牲醴庶羞祭於兒栗暨新婦貞烈楊氏曰恩莫重乎父子事莫大於死生吾昔以有爾而樂今爾死矣吾將孰樂形影自顧行道心悲况老且病邪卽後有疾如去冬則誰將汲汲奔走如爾者於乎吾心裂矣尚何言矣人有微小疾病尚百方拯救惟恐害事新婦則視死如歸若茹膾食蔗豈故自輕其生不念父母養育之恩邪然綱常所係尤有大於是者故新婦樂然就死以鴻毛視生非爾父母家教與吾見履方迥義之效何以有是於乎痛哉明日吉辰往瘞爾柩於前王新婦之壙腸斷心裂不能汝留惟爾有靈其歆承之

祭北山文

維嘉靖十二年歲次癸巳二月甲戌朔二十三日丙申前翰林脩撰康某謹以柔毛庶品奠於故中憲大夫都察院左僉都御史姊丈北山先生之靈曰於乎北山乃竟不起邪骨肉之親金蘭之契三十餘年而莫逆者公一人爾我方以公在足以相依語笑同終



天年而公乃有此聞訃之日痛徹五內然安能復得見公握手道故昔哉於乎生死者理之常而數之定也年登七旬正終牖下有子有姪廉孝之節文章之譽海內章縫之士孰不仰之丈夫之事備矣盡矣尚何云歎聊陳薄奠以表我哀先生其右臨之尚饗

代南臯祭北山文

維公稟德宏邁知能先覺高不抗俗和不隨物應仕昌朝人比管樂觀風畿內姦貪是却節鎮宣府恢拓廣博勛業垂成倏爾擯落歸田念年宿志愈恪明農水北何愧何作間有德音衰然古作某忝舊遊訪公梓里握手數言益欽膚美聞訃已久心恒惻然聊陳薄儀用奠几筵公靈不昧鑒此微虔孰德如公不爲世傳尚饗

祭虞部張大夫文

於戲自古文章之士能以稱述爲世高者蓋少焉公自齟齬至弱冠人人皆畏之及舉進士爲虞衡大夫人又以公爲誦也何至是乃又以歿邪於戲古稱文章之士獨得天地之秘故不能多壽與大爵祿若韓退之柳子厚蓋已有然者矣公之作聞之於人傳之於耳固不知與二公何似也其所遇則大槩類矣於



戲哀哉某等往歲試禮部實公所舉故於公之卒無不哀焉士於知己其報也恆重然茲已無及已苟無善當取公之文傳之尚享

行狀

先平陽府君夫人張氏行實

先君諱鏞字振遠上世故固始人七世祖政始徙來居武功長寧甚富實有貲又能慷慨任義故長寧人倚仗之子廷瑞博學篤行仕元爲興化學官云有論禮樂變易之事於元不可攷矣生六子其三曰世睦純行不仕生二子珪琪琪善稱述文義亦不仕生子諱汝楫初爲武功訓導高皇帝時詔求文學端正之士敎太子乃辟爲燕府官後乃出爲安岳令文帝旣內靖召爲北京行部左侍郎授璽書留輔皇太子凡北京事得自治行之文皇帝眷念功德將封爵爲侯固死不受及卒仍上表乞免賜贈秩上竟允之乃官其子爵上林苑監正禋上林苑監副至昭皇帝時始贈資善大夫工部尚書焉爵累官至中議大夫贊治尹南京太常寺少卿性耿介不與物事至則亡避患害爲之故數言時事便宜皆得無怒時貴人生子諱健膚皇帝以爲通政司知事食半祿終身奉祀先尚



書天順間嘗言漕河事宜皆深有計度不得行故所  
自志者咸由是毀矣夫人曰袁氏浙江按察司僉事  
溥女生子五人長先君次銓次錫次鑾次錦先君生  
而哲靈年八九歲卽孝友善文辭有所著者長老爭  
紀頌之弱冠益深詣事理曰述序不若馬遷理辯不  
若孟軻功澤不若伊傅是未可已矣故其意雖與數  
代獨雄焉初以先太常居南京故就辟試南京南京  
士來試者皆尊禮眠之然數不第乃後歸試關中關  
中來試者又皆尊禮眠之然乃又數不第乃後歲貢  
來太學來太學乃又就試太學來試者乃又皆尊禮  
眠之然乃又數不第乃請改南雍以就先曾太常之  
域居祀焉曰凡吾所爲試求以見志於世今若此非  
吾不解時文是命獨弗可耳與我匍匐然求合於時  
孰與我脩先王之法終身也故一切削去倥偬不欲  
聞乃後又覽莊老及浮圖書歎曰人以形骸處大壤  
其速絕若飄風也予行年五十又四矣吾弗以忘功  
名之會是取速絕而已夫孩提於班白期甚遠今忽  
忽若瞬息卽能至百歲政少半耳京生有言孰易如  
葦孰化如燬言生死易至也夫喜生者欲心恆安佚  
也君子疾沒世而名弗稱傷功名之不立也夫功名



於身至疏也古之人以死效此者謂可萬世不與物  
朽至厚身也今不得之功名又因以勞廢心體是非  
喜生之道耳語曰百人射招亡弗中矣百物誘生亡  
弗傷矣夫乃今於吾可以已矣乃遂自謂爲已菴君  
後五年因出爲平陽府知事知事甫一年歸歸一年  
病癱痿不履又二年 治壬子正月癸巳乃不起生  
宣德庚戌四月辛未春秋纔六十三矣夫人曰張氏  
邢郡名家女父曰賢仕爲南京鴻臚序班忼爽有執  
故嘗與先公通政交甚厚也配陳氏生夫人陳氏卒  
鴻臚公亦卒夫人乃依母氏母舅陳君者南京親軍  
指揮僉事也亦嘗交先公以先公與鴻臚交也乃歸  
夫人於先君柔惠善事事先曾太常李夫人李夫人  
甚篤愛以爲有嗣婦矣事祖妣袁夫人袁夫人又甚  
篤愛以爲可以事太君夫人矣太君夫人者袁夫人  
以謂曾太常李夫人者也李夫人性善嚴肅先公年  
過五十猶不敢侍坐侍膳至白首不能審識意向惟  
夫人獨能權心奚不可謂善事已矣性又遜惠亡所  
私方來歸先君四叔皆少也衣被一切與爲補紉及  
叔皆壯有子又視其子懇懇劇劇亡以異不肖故四  
叔與羣姪子女皆終身善感夫人若母者矣夫先君



取夫人才再歲也卽歸試關中十餘年十餘年乃更見之未嘗有怨悵固曰母以妾累君子之志母以妾累君子之志生男子二人長阜穎敏有神年七歲善詩又善爲楚騷十八歲死季海支謾儻蕩亦頗修其先人之業然莫能閔也以時文謬舉壬戌進士第一爲翰林修撰取尚氏女子一人嫁爲乾州士人習五車妻故有孫男子二人俱殤矣今所存者有孫女子三人與新生孫昭允也嗚呼先君碩美有容膚體若凝玉人望之如神仙有接其論者充充然如有重獲也屬文賦詩皆簡古爾雅漢魏以降殆莫有尚也與靈臺人楊重長安人李錦同稱爲關內三才然其朋當今之務察識事實可以名實潤澤亡虛恢者若先君益數代鮮矣方歸試時考官列置第一及拆卷叅政張用翰亟謂御史曰此三秦豪傑可以佐伯王者吾故聞閻文振言今乃幸自見也願遂予之文振者故順天尹馬崑閻公鐸也取於先太常之子於先君爲姑御史以故與閻氏隙也乃遂置先君不予第後叅政語先君曰是我以誤先生也先君曰僕自卯試於今皆可取上第然皆不能取固非皆御史也然是吾命耳然於吾何疑焉卒不怨御史也成化甲辰關



中大饑人相食先君方南遊甌越遠召所故厚者集  
數百金具載糴西來至汴糴盡爲盜掠乘舟又數被  
風顛沛幾沒中心怍怍營營鄉里事勢益窮峻亡訊  
乃冒恐疾馳至家見先太夫人跪膝下殞越欲絕然  
由是遂成病心及其卒時心病未間也少壯時所交  
盡名公長者餽遺常積至千金隨以奉獻先公先太  
夫人後乃盡授諸弟諸弟皆怡怡惇惇惟恐勿有歡  
心不稱至於今諸弟苟有言之皆咽鳴泣下固非以  
其能散已也昔先公教五子各一經舉進士皆先君  
躬自講授蚤夜孳孳然惟恐弗能寧先公也後子阜  
長益欲教育爲聞人阜死不肖才一歲其生稟未覲  
也乃歎曰天乎我固以窮乎乃果弗庸顯吾宗乎不  
肖旣六歲能誦口授始稍稍不煩憤十二教以古今  
賢聖之迹及指要同異曰今固未必知苟一一記吾  
言當後有思可以成名人不肖雖私能識之然好逐  
趨童子羣戲凡戲又多支謾亡狀先君益重自怒絕  
乃長棄不復教至於其大病始思繹所故嘗指者則  
先君已弗省解矣今雖能致錫命於先君然先君又  
安可知也幸猶及先夫人先夫人乃又已矣嗚呼其  
已已矣先夫人言當先曾太常公及先曾夫人喪時



先公哀毀至骨立凡事治皆先君行焉先公先太夫人有疾晝夜不解衣宵旦百拜顙天必及可乃已後至先公先太夫人之喪適家事中替先君極力勉成大事哀隕號極幾不能生也是非其至孝哉然先夫人實能定轉相先君凡先君所欲與不肯留也所欲向不肯後也始不肯以官祿事先夫人先夫人每食輒泣下曰昔太夫人謂爾父及諸叔有養如此乃不能俟見之爾父亦謂必以養太夫人及能視爾榮顯然又恐不逮顧我身自享之又眠所抱孫謂苟百歲以報爾太夫人及爾先君可含笑下里矣先夫人卒時二孫已殤折今幸有昭允然安可知也嗚呼其慟也已矣先君故有文字數萬言皆散在知予間所存者僅三四十策耳命曰已菴集先夫人生宣德甲寅三月乙酉至卒日正德戊辰八月戊寅春秋實七十有五嗚呼先君隱行甚衆其詳細多在長老口今不能一一載載其大且槩者其先君之風因明著矣不肖常竊怪世俗好誣謾其先人益重爲人指議心甚傷之故述事多不盡先生文思深厚凡評論皆當實不修也惟采擇以加堅石斯康氏事行久遠矣此恩德至厚永世者幸惟先生圖焉



邑後學

張廷梅與松

孫燮午卿

校字

康對山先生文集卷之九

後學

同邑孫景烈孟揚選次

長白瑪星阿景謙叅閱

應槐兆三

邑後學耿性直伯正校

書紳公佩分校

何瑞雲卿

賦

夢遊太白山賦

余歷覽載籍所志古人之辭由屈原宋玉以  
來不可勝計而浮靡侈放之辭蓋托諷寓興



者之所共趨上林之後益蕪益漫亡能爾雅  
志士之所賤也余感風人之義因夢遊太白  
山歷見竒瑰駭異之狀乎於人言退而作賦  
凡若干言雖極假借要皆自喻其迹少有虛  
謬諛駕凌絕之病示諸同志皆曰可錄

治闕逢攝提格終相之月康子夢遊太白與金子  
可卿乘馬領僕各執糧糗飲飼之物浮漆涓跨郿塢  
環惇物逾武功去約萬里四望塞蔽恐怖猙突惶惑  
震厲若將遂爲虎豹之嚙有老人者雪髭鶴髮電目  
龍顏自西而來若愛若識請以前路則笑而不言少  
頃復去金子曰若非山川之精邪豈將疑我以迷悔  
顧我以虛誼也乃躡以其後則豁然四開巒回徑折  
泉下雲散予曰是未可止也夫八紘之廣獨有太白  
盤礴崑嶷瑰嶂崎嶇神靈秀明崑嶷巖辭夫是但謂  
末麓近壑然未遂也乃與虬蜒仄石轉附垂藤升矚  
巉壁靜嘯絕坪忽萬里之瞬側何溟渤之未窮雜卉  
菑葱石泉沸騰嘉樹驂乎九御神風颯乎太絃驟駢  
散乎飶粒蛟螭視乎細繩電光恍乎山足雷聲浩乎  
廣聽零露凝其在衣松濤悠乎啓聲金子曰快哉遊  
乎夫造物者假我以聖智崇我以令德我弗用觀奈



此膚景遂直詣而不同何茫迷之勿騁乃爾若神物  
之可憑歷千巖之邃嶺山石儼乎華嵩細流浩乎滄  
溟蓬蒿翳乎峯壑墜葉震乎雷霆老人跨鶴從雲前  
下笑曰異乎子之善勇也夫太白始峯炎暑冰沍萬  
夫之勇亡有敢及况迨於是夫是泉脈應乎坤軸遷  
飾極乎越區天扃邇乎可聲神祇恍乎可呼至循崖  
之前重谷之裏百鳥不宿神獸亦避雖至人亦蔑有  
入也越此百里西下陰壑復關峻嶽則金屋龍棟控  
亢聳搏異花雜乎瓊瑤僊風冷乎清綽靈芝馥乎滿  
郊麒麟馴乎盈郭龍蹇屈於平也鳳翮聯於長漢此  
則上帝之秘區而太白之關鑰也其東百里瑤宮並  
殿萬戶齊啓蒼光青氛四回周起函丹書於億笈紛  
朱絃於兆徵散靈繭之如斗歷綺轂之奇靡總百綵  
而具存奚瓊桃之如累此又太乙之宅合陽之宮至  
其南也朱雲陸離丹閣霧霧神桂宿日南極奉塵羽  
翰極乎麗暉珠貝極乎雕飾鵬鴉駕而鳳軒鯨鯢御  
而兕履是謂朱明之宮天帝之闕北則至幽號曰元  
府紫微之所宿萬象之所聚玉臺瑩光冰柱炫色珊  
瑚如林水晶四徹雲沆漻而守默氣鬱森而馳起靈  
龜元龍叅錯其下松檜接乎帝闈金碧曳乎泉石翼



八獸以守衢役百神而司臬夫皆五天之至精萬化  
之樞紐能有至者皆必具靈負秘與抱圖膺籙之士  
有天人之德者也已而風柔香墜路豁視空若雙龍  
之負引倏靈宇之就中僊姝麗乎兩間洞簫錯乎萬  
笙皓歌凝乎飛泉朱絃颯乎翠空座列煥乎雲瑞境  
象委乎穹權環珮鏘乎旖旎禮數儀乎動容予乃攝  
衣升堂長揖就位悟人世之囂紛歎靈扃之皇闕乃  
與金子終身同丈人居之不去

憫志賦

嗟嗟余窮兮孰余之厄余行欲修兮予處之索一裘  
弗完兮糠粃曷擇冬長寒冽兮暑亦奚緒上帝孔惠  
兮旣昭予宅曠而弗居兮實予之責嗟彼高人兮胡  
有不獲予曷獨難兮有行必畫歲月不留兮憂心如  
割嗟彼朋友兮各謀爾懌吁嗟奈何兮孰予之格達  
人不逢兮自彼古昔匪予一人兮烏敢不措

琴曲

太白操

太白兮何爲日中兮揚輝昊天兮孔明我陳兮誰聽  
徘徊兮路窮自顧兮傷衷

握手歌



對山文集 卷之九  
春日遲兮景芳鳥鳴啾啾兮孔陽與君握手兮相將  
前度飛坂兮後岡同心之音兮自長矢中夜兮未央

四言詩

悔過詩

徂齡不來謝景詎待覆杯莫收燼灰罔再青春窪窪  
白日杲杲自飭弗勤如彼蔓草或潤而達或槁而衰  
緝而熙之非予則誰予自謝黜益驕以倨心騫志翔  
曠視萬世哲人則敦愚人則疚匪予之疚予惟斯謬  
春令知風鴻鴈知冽賢則恚昏甌安有竭往或弗知  
今已甚明逝茲靡劍將大且橫武公戒抑憂祖畏口

繫彼喆人胡寧不守班班虎皮言設之几交交繁言  
道則何理尼父惡邪誅以司寇舜憎四兇位在元后  
孰云齊民乃怨乃慝若彼水木旤發必克皇運廣大  
布德商周閔予置予祖考之休日月方長德輒云坦  
伐柯視柯其則豈遠季春壬申日在辛酉式歌不支  
可以永久吾言罔反爾行孔棘君子攸崇是戒是力  
五言古詩

於詩西別業同承裕升之作

還耕愜初願揖世返空林雖非志士理已獲靜者心  
嘉賓青雲客枉駕忽相臨攜酒共斟酌張絃揚妙音



義厚情自叶道合契滋深漪漪漳川水幽幽南山岑  
相值不相樂奈此逝者侵

四月七日雨中同文浮山坐作

初夏草木長鳴雨更相逼來牟生意佳枝旃望如織  
陽日不下臨此物終且蝕往者已已夏頗爲旱乾棘  
徂春苦無雨兩麥俱豐息因懷老農語往往未差忒  
窮居繁口食所恃耕耨力明日更如此與君甚胸臆

行至曲里見杏花

春中渡河陽倏忽到曲里滿村開杏花參差亦堪喜  
關吏自北來云承呂夫子遣之迎野翁謹愿頗謙禮  
述答俱有章稽援或通理感歎君子居端能化凡鄙  
隔歲慕良覲不謂邇若此芳春解人意夾路疊紅紫  
宿醒方苦人畢覽興與彌起

子卿泣別圖

積怨世豈惻感別會仍艱置酒話風管詎終千萬端  
嘆息淚沾臆徒令摧肺肝昔爲雙飛龍今爲孤翼鸞  
丈夫耻微諒况爾烈士顏躍馬窖上別欲歸中自難  
徒切報主恨安悔軍吏言勝負有微數奮勵心所安  
所以君子人不處嫌疑間

於近山尚書莊上作



春風纈芳林虛堂翳修竹苟愜靜者心寧慙世人目  
昔予懷此遊悠悠幾更宿豈期聯輿來沉醉臥茲曲  
高歌嘆往蹤遐眺覽前躅主人古司徒雅興薄裴陸  
但能永今夕何憂乏醺醪

寄伯循

秋風西北來偃蹇坐茅屋四壁無纖塵當牕有書牘  
不問作者誰啓牕再三讀一讀意已駭三讀見衷曲  
憶昔年少時心志各有蓄不意謬通籍先君被薄祿  
朝夕望君起如彼饑者穀我已罷館職君方屨官祿  
味苦不可人旋車亦何促主上堯舜姿舊章理當復  
平生稷契心豈爲世情覆尚期謹藥石慰此百姓慮  
予也素蹇劣茲志每中熟屢犯涵遜懷幾構邪罔獄  
顧影苟不虧於道果奚辱山水性所嗜喧恢豈吾欲  
屈指君歸來三年但忽倏人生不滿百激勵在初服  
可似山中人忘機泛醞醪

讀史

鴻雁不老越蛟龍不潛岡平生志嘉遁佐儲抑何狂  
因嘆務光輩惻惻令心傷傳記尚溢美其言或荒唐  
嗟彼高帝業赫赫繼三王孺子安所見胡爲遽辭商  
契會視豪傑出處聖所詳感嘆擲其策願爲史臣俎



其二

天邊有黃鵠高飛一千里烈士耻庸節世事特做屣  
朝辭上東門暮從赤松子感慨風雲期超悟在還理  
進既有所因退亦何所倚獵犬貪兔狐不免竈傍死  
富貴多嶮巇英雄如螻蟻所以明哲人窮達重狗已

至終南

泥濘抵終南迷蒙失山色指點太平宮崔嵬白雲極  
不暇自抖擻冒雨且綜核憑高矚村落嘉樹萬重黑  
此地素靈異氣候故不測旦日雲氣消嫩碧競寰域  
綠草彌望浮波光與山逼迤邐白鳥來條蕩千慮息  
宿性喜邱壑躋攀易筋力深秋事佳遊長歌鳳輶默  
早晚幽卜築終以臥斯側

間居詠懷

窮居無別棕掃徑揖清靄濁醪自斟酌幽花復芬馥  
雖微恣性歡亦鮮迷津慨寒虫相續鳴潦水參互沛  
節物漸以更人事紛相代猗彼巢由徒曠音昭物外

蓋屋喜太微至作

此日復何日眷言會君子方擬躍馬尋忽焉具來止  
來止將何爲握手論文史春城沽酒佳斟酌一何喜  
普緣古仙遊山水嘉無比若賦南山篇請君自茲始



濟西喜明叔孟獨二君子至作  
我本支謾人嘯歌濟西曲心喜談道術性憎傍塵俗  
二君英俊才世事豈拘束同遊終南山文采奪人目  
數日返墟里此意常在腹因念蘇與黃聲臭一何屬  
我有輞川吟鄙近不可讀請君勉和之永爲此行馥

示習方

汝母我之姊同胞無別親不幸去年死煢煢惟汝身  
汝父既早沒汝依當何人數數與汝語令我淚沾襟  
汝性頗靈慧力作何不勤青春易凋喪歲月良可珍  
汝能事卓立非止裕汝屯指名爲令士汝親當見伸  
何苦逐遊衍弗肯志討論撻之尚不易况乃頰舌云  
汝祖好男子豪爽多譽聞辛苦教汝父異登要路津  
汝父乃不穀漂蕩成苦貧幸以汝母故托居我南隣  
黽勉相勸諷粗能禦寒溫謂將致興發豈意掩泉墳  
遺汝無寸土汝母復長淪近日乏良吏役賦甚紛紜  
富者尚難埋貧者安可狗不見擡輿者四體如火薰  
不見負輪者鎖桎令肉皴我年已五十豈得常逡巡  
作詩以告汝請汝書諸紳

於高陵壽明叔初度

爲薦呂夫子因之涇渭川中道遇來使慇懃出素編



久知滯王役不謂會此塵晴春懸明月惠風乘遠天  
木末雙輿至迎我城西阡握手但相笑恐是夢寐然  
宴我旅人舍坐我紫綸氈童子出名酒飲如鯨吸川  
召君賦葛蕭予具南山篇

過張子西谿作

自予抱幽戚三載鮮遊眺春日忽言征聿底滄洲妙  
柳色參差生芳意遠近耀張宴臨谿波彈琴遞清調  
惠風當襟懷遊賞恣舒曠匪效蘇門狂將追虎溪笑  
少日牽王役結綬事廊廟直雖見稱齷齪果成誚  
饒稼潯西曲探竒歷幽徼嘆君本素心晤言希久要

答仲木

適性卽爲樂處安寧怨貧客來遺我書乃在涇水濱  
再拜讀此書道意何慙慙昔爲鸞與鳳今爲參與辰  
相思千萬端縷縷難具陳浮雲蔽白日遊子殊苦辛  
道遠行不易戚側傷我心

答桑華州

桑君英妙人恨與識不早脫穎豈性成豪爽蓋天造  
再會益琤琤故言皆了了眼底似君稀勉旃爲世瑤  
半年下山寺乃趨坊里道所過六七村村勝城堡  
柝聲遠近連人家氣色好共言今兩年懷抱絕不惱



仲木至夜坐作二首

錄一

我前抵華原訪子雲槐舍偶值何仲默清談忘晨夜  
冲懷世寡知繁文俗方化芳臭不同科辯別每未暇  
羣口雖見珍私心竊常訝莊生吾馬云其見豈欺詐  
後會王敬夫飄然契茲話乃欽吾儕直益陋杞妻下  
潞西春酒熟南山翠如射明日會同君細看盤谷畫

園林瞻眺同仲木作二首

古意世方疾太音人和稀豈不逐羣好恐與賢達違  
朝遊三時原暮宿唐山磯感此榮悴異已悲馳驚非  
所以素心者見之心每希灼灼園中花應應南山薇  
及茲不努力老大將焉歸

膏雨旣周徹田工粗可期黽勉命童僕籃輿詣東菑  
欣此莖麥遂坐令芳意彌業歲望豐衍行樂值晴熙  
况與良士同更愜山水思擊筑發古調彈箏奮新詞  
夜以繼白日瀟灑孰可追

聽雨

達旦不成寐卧聽秋雨聲雨亦竟不歇吾意何時平  
前年秋八月淫雨百穀盈禾稼盡腐黑况云屋圯傾  
此雨復彌月巖崖千里崩不知上帝意豈欲移蒼溟  
吾生殊坎軻一紀事農耕兩田俱不稔百口常見嬰



奈何赴庸調已欲樵棟楹老妻向我道但坐且勿驚  
人事尚莫定天道寧易明脩短有恆數豐歉惟所丁  
牀頭有美酒馨香盈玉瓶君姑自斟酌可以助頽齡  
醉卧忽將午此物方雷鳴

張甥之桀自華西來省予與之開尊夜坐辭以

辟酒數月之桀少年英妙勵志若此誠已罕

矣因賦詩贈焉

勵志古猶鮮嗟爾英妙人超然契神理謝此麴米春  
盛時富遊燕昌齡當令辰但恐樂不滿安知中足嗔  
所以賢達士寸陰日以珍張甥出名裔磊落吾所親  
奮迅異往哲慷慨懷先民述此止酒事言辭皆絕倫  
彭澤雖有作徒以愠同塵豈若慕宏達精詣吾道津  
事以久乃定節懼中路屯願言永初服白首以為道

答都人

還車滸西曲半山含暝色朔風刺我衣欲止不可得  
入城逢都人白馬啣金勒下馬揖車前被服甚奇特  
授我一緘書題識頗脩救展書讀其辭耿耿亂胸臆  
一別十三年安知如頃刻勞君遠問訊况此常相憶  
習靜厭世喧冠冕志頗息秦馬不嘶越南鳥豈棲北  
野人各有懷所務在稼穡慙慙謝都人去去慎登陟



詠懷二首

錄一

悠悠不能寐惻惻與心違百歲若一瞬怨言長分飛  
結髮翹伊始寒帷念餘輝紉蘭坐崇阿調絃拂金徽  
志願各相許窻窻幸同歸豈期中道別空餘衾與衣  
臨風想德音當牕拭殘機往者旣莫諒嗣者安可希  
從象峯北崦下望普緣  
陟山披叢薄覽景愜幽素降觀萬壑奔平臨千嶂赴  
宿愛彌見欣新賞豁相聚未覩赤城遊彷彿興宗賦

送灤江中丞西勘

秋雨復如注旌旗仍尅西僕馬不能立杯酒那可攜  
公歸定十月山莊事粗沒新釀旣已成嘉穀有薇蕨  
卽今構小亭亭成竚公坐雖無絲竹陳可試風雅課  
南山秋暮佳氣色清且翠眺覽旣中愜嘯歌或幽邃  
此役干國經天下由重輕古哲務成事今人唯釀名  
往在十年邇邊陲太乏理與皂皆所親毀譽出憎喜  
雖悉延訪心紛亂若絲泉積今日益滋君子復輕信  
自謂根蒂獲豈有纖細近治邊如治鮮要在審其勢  
剖斷貴神速宰制厭牽係近聞甘泉城皇皇盡危懼  
王者論不開倉卒何以計遠人遵訛言其情易搖曳  
片言崑崙摧轉擬萬夫斃公固豈弟人弛張有程具



向既失緩急今且須砥礪同事六七公休休皆偉器  
當事必安舒臨機戒輕驀嗟嗟千里心顧此豈能白  
亦知芻蕘微贈公冀公擇

姜君錫過予作

君家篆江側秀屏當戶開知是神仙人胡爲塵世來  
黃氛緇素車皂蓋冒朱埃以茲謝民役返耕白雲隈  
少小稽古昔中式得此階亦知慎官服奈與寸心違  
欲往昧前筭欲止遞成哀繫予邱壑士諦此良用駭  
因陳接浙義頗究蓬矢懷我固互相發君固耿難回  
丈夫志四海好念濟川才嗟彼長沮徒泛泛豈根荄

送大理西勘

返耕厠幽壑服義屈高軒握手立斯須傾倒見雄論  
昔宦忘孤陋中路忽履屯負罪苟不死茲已含溢恩  
疎懶循故性竟志紉山蓀感君繾綣意幡然謝前聞  
殺鷄饌雕胡列坐開華門斗酒醉方已徘徊惜日曛  
今夕別君去孟冬定迴轅尚期撰杖屨共眺南山雲

寶穡堂作

明農謝昌宦良覲羨予征敦義昔所重况此骨肉情  
嗣歲節物改朱陽喜開晴感今歎伊昔發車臨廣庭  
所期德音邁永脩三徑盟



平生尚超曠結廬武亭川本非青雲姿竟作金閨愆  
托交三十載孤抱亦何淵邈觀古昔事彌想梁甫篇  
感此發深省誓以俟餘年

彭麓夜酌

露坐架棚箔鄰翁高興多轉觴話農事絕勝陳綺羅  
西村二三子攜酒復相過忽忽至更盡悠悠奈樂何

觀禾

我來彭麓下坐愛青山色雨過忽新涼蒼烟望無極  
秋禾行欲成豈畏驕陽逼隴畝綠如屯原隰少螟騰  
同欣有年樂詎知天子力

解梁書院四首

層峯拱堂宇蒼翠何嶮嶮盈盈青衿子絃誦夜不輟  
斯文今在茲感嘆懷往哲繫予值乖蹇望道日遼絕  
衣冠羞壯遊疎懶愧先烈結交君子徒努力崇明德  
變故身屢輕涵養意恆切歲序不待人君子慎其節

其二

諸君青雲姿宿志各高尚奮迅良有期優游每中諒  
脩禮慎逸居稽古却支宕得師忻折衷遵道決趨向  
我來坐茲堂誦習惟覩創始信豪傑人履歷不虛妄  
科條從昔云謙恭見今讓文采雖所珍躬行以爲上



其三

近世尚夸毗造詣實終鮮徒以言語微遂謂道昏顯  
推行跬步艱况此繼墳典狂瀾及明興愈覺支粗淺  
徒有析理名竟爲粉飾免天錫涇野君特被人文選  
篤行遵誠明因時表舒卷吾道果不絕覲此脉如綫

其四

猗猗青衿子勵志各有圖逸志凌天雲麗作驚九區  
或爲廟廊器或爲章句徒華豐實乃嗇枝榮幹還枯  
豈若剜雕琢逖爲君子儒所需出所養與世作匡扶  
莠穀諦嘉種種木審良株我詩揭堂左百爾慎所趨

贈寒泉中尉

澄瑩絕纖翳一泐瀉千里寒月搖輕波山光徹波底  
魚鰾不敢遊虬龍得猗猗轉盼清素心挹飲滌凡鄙  
平生畏炎蒸見之輒中喜願言保真寂勿以塵氛免

贈灤江公十首

灤江公巡撫關陝三年矣政通而人和道直  
而履固不隱謗不易行有仲尼在魯子產相  
鄭之風焉予自壬午春遇公於長安時予卧  
疾敝廬公特枉臨握手論心亶亶不倦雖丁  
陶孟韓何以過也後公訪予於潯西山房適



北山楊宗文漢陂王敬夫東谷張用昭有唁  
於予於是數人者同會公於武功行臺公咨  
詢之餘則賡倡連宵琦瑰之氣爾雅之作揆  
之近覩或已鮮矣今年秋公擢南京卿戒行  
有日公以書別余昔予與公約公東歸當餞  
公華山之陰聞公行止信宿而予有子桌婚  
娶之事因成小詩十首先以寄公十三日桌  
事當畢卽擬來日躍馬循驪山而東然後坐  
希夷之洞調河華之雄酌桑落之酒歌白雲  
之章與公傾倒數日則亦人生之至願也

嘗讀公之文與詩有風雅之遺思而驟車復  
在於冬中於是取少陵北風隨爽氣南斗避  
文星爲韻苟傳之將來斯亦當時之實錄爾  
輪車戒晨發循此東南域握手立斯須徘徊意安極  
念子有幽思別言心如織昔爲同生蘭今爲特飛翼  
人生易悲樂良晤昔所恤黃塵暗清渭對殮安可食  
嗟嗟君子心遐眺在燕北  
昔僉少陵騎長眺望夷宮故都多景象近蹟迷往雄  
感慨發孤詠宛若思悲翁粵惟霸上垓已昧天所窮  
自非大雅操詎識卑與崇挹泉漱寒碧酌醴揖羣公



志直意不忝巍然君子風  
關輔比多事欽公能自綏  
養寇蓋往昔弭亂豈今詎  
崇貨狎卑吏飾貌忘遠規  
公來屏笑色事至任安危  
素衷物莫挽逸駕古所窺  
雖有麤裘謗倏動赤烏悲  
所以丈夫行不與流俗隨  
逍遙奮孤邁葳蕤愜淵想  
北眺崆峒津南矚孟諸塊  
麾塵靖疆場撫劔清罔象  
黔庶丁溢恩牧宰獲嘉賞  
中原久瘡痍西州獨豐穰  
感歎乖崖心詎俟益州榜  
夷誦南山章令人發森爽  
道以無垢尊蹟超誠所貴  
皇皇廊廟姿世運實經緯  
翩翩翊鴻業皎皎分萬彙  
嗟自丁卯來海宇日騰沸  
羣公徒憫艱虛恢果奚謂  
薄俗慕驩虞君子念聳聳  
巍巍城邊畧足回萬夫氣  
披叢憇軒下撫卷輒中慚  
笑我伎微薄無能續高騶  
緬思雄詠侈一發連數函  
咀嚼味逾雋詠歎誠所耽  
贈瑤似劉傅酬德悵廬參  
清風盍將遠鄙志揆豈堪  
那知邂逅際復送旌旆南  
公歸止信宿予餞苦淹後  
耿耿徒憂傷役役定誰咎  
憶昔承明直相企亦已厚  
公念薄綺紈予質等蒲柳  
雖能慎初服終恐易衰朽  
樂遊觀五陵氣候稍非舊



對山文集 卷之九  
歎息君子陳宵興望南斗

徂歲始炎鬱岩洞共公萃趣若陶公琴興越滁守醉  
旁眺牛頭原橫坐竹林邃微風滌煩襟冲抱澗靈秘  
偶聞林鳥鳴遽動舞雩喟公度比莘父子志豈荷蕢  
喜貺彌筭來欲和復中避

曾同溪吸飲  
太微洞中

悠悠長安道車騎紛如雲父老泣相謂童穉聲欲吞  
借問道傍士述答甚慇懃三秦失慈母黔首懷使君  
餞送順心意昊天安肯聞徘徊玩此語感慨異前云  
不覩澤門誦焉契章甫文  
予懷繫莫卽公訓安可聆矢詩雖不多聊以宣德馨  
高駕旣難挽孤忠益屏營北風嗣元序節物改仙萸  
追送理應及鬱陶浩豈平華山有崎嶇髣髴出青冥  
煩公待予至同訪少微星

飲酒二首

錄一首

獨居意靡暢行吟心更傷晨發望原際佳氣鬱相望  
恨無同懷人躍馬陟礧岡徘徊日忽暮感嘆琴屢張  
山妻出美酒斟酌爲君嘗三觴起孤抱百憂忽若忘  
丈夫生世間磊落斯所臧何須久鬱鬱自如陌上桑

白石樓

我聞白石樓乃在太行下丹梯凌紫霄朱薨接巖罅



盤鬱橫汾曲崔巍紫金叉斜煙蕩洄瀟朝暉耀簷房  
兩溪互縈帶千峯隨晦冥嶂屏萬翠列花柳四時明  
平生喜遊眺詎可如孫登春中過函谷遂有勃澥行  
徒懷南莊老安能愜初盟人事苦促迫三日滯虞鄉  
雖有泛舟趣却無曾點狂回想王官谷新詩滿素墻  
不識仲南姓徒懷詩思長便思與握手於時共徜徉  
同遊誦其名知是南莊子故家有若人私爲李公喜  
翱翔翰墨場倏忽逾四紀不謂英俊姿尙在秦晉里  
何當登此樓醉汝賢橋梓三嘆發朝邑彌月興猶起  
感君寄書至展轉愛君才欲見不可得空望白雲隈  
吾有雙黃鶴飛飛自天來因逢王子晉借之遊蓬萊  
一去竟千載寥寥猶未迴迴時坐鶴背挈子臨高臺  
先過崑崙頂後矚弱水涯徐訪紫華君持其雙玉芝  
吾意竟不歇君心幸勿改寄君白石吟惟君爲予待

整籍

三年困人事何曾理書帙烏鼠白晝遊入門忽首疾  
架閣具傾覆點檢切中怵凌晨趣灑掃整頓倏終日  
種類旣品題編簡復齊一不但几案清幸靡萬一失  
焚香坐望餘儼然成靜室平生風雅情殊以乘蹇室  
追惟感歎生端坐還羞懼何如谿上翁翩翩獨閒逸



植樹

此日春氣和萬木具含秀况我山林居園列頗成就  
客自盤厓來驅車扣圭竇白楊二百株緋纒載其後  
根繁生意多幹潤理宜茂倩人速植之行列未差謬  
雖愜靜者心尚祈后土祐澆灌分所勤盤踞晚應覲  
結廬謝王役懷愚負時謬糊口聊秉耕舒形得佳岫  
卽非松菊場已還榆柳舊但資歌嘯心絕勝笙竽奏

於許西贈別明叔三首

三月詣茲曲八月今始復結纒送君歸投壺泛醴醪  
風清懷抱優暑退涼氣淑我歌苦不長聊以詠幽獨  
荒徑殘草多空堂蛛網覆豈無灑掃資紛糾在塵俗

其二

時日得君來開豁極心目夜坐對明月清談倒筐腹  
方礙千日歡詎忍後期促餞子卓午天徘徊口西沒  
眷戀勿復言去去保餘馥

其三

詩人古不易流靡及茲俗片言務剽竊侃侃遂驕足  
還耕十三載安能愜吾欲覽子中秋篇翩然接華轂  
大雅當在茲斯文有歸宿麗藻雖可珍雄渾久未復  
願言泝其源開彼漢魏毒



登菴翠樓眺望川原

我登菴翠樓川原鬱迴合方喜風霧開倏見煙雲匝  
直東看黃山三秦如堵圍興亡理堪惜念之渭朱顏  
同把一尊酒勸君爲君壽莫負當春遊人生若芻狗

經漆村覽有郃古蹟

我聞昔人言此卽漢漆縣其東故有郃草木殊葱蒨  
終南當面朝清渭過如練直北倚黃山逶迤控周甸  
前望松檜場知是何王殿王蹟日以微氣色或隱見  
西南慶善宮鬱當漆村面勝地遷變多在躡審彌眩  
繫自虞夏來百祥具茲奠地靈昔所庇諦此竊中羨

過慶善宮

長川直南瀉清渭橫其衝灝光觸雲漢此下潛真龍  
欽想還譙賦緬懷天日容地秘非天發安能爲人鍾  
改寺報慈德謹護列崇墉淪沒幾百載所遺惟巨鐘  
後當景泰未移置薦福東千牛不可載百室或啟凶  
嗟此亦神物似與守靈蹤滅不能見大約聞老農  
但與看氣色巍巍冠秦雍

彭麓山房宴作

南原雙白楊直上數千尺彷彿齊彭山不爲后土搯  
山房當其陰瀟灑殊曩昔置酒勸君飲慷慨盡三石



歲月不肯留人生豈常適試問華岡子誰見王維宅

觀刈麥

我從華山歸刈麥已大半自長安迤東實美如火炭  
繫我返耕來此麥纔再見接歲禾不登寶玉成所賤  
周人重農食特分田峻職公私積蓄繁詎有旱乾棘  
春首餓莩多朝廷甚憂恤今日得佳物守護須謹飭  
黃金殮米下其語殊謹直作詩告有位國寶在稼穡

五月二十二日桌死踰旬僮子以其所爲詩三

卷及雜集回文稿呈覽悲悼之餘令之繕寫

成帙用寄泮陂先生爲桌較定將圖入梓漫

成二詩以寫予懷

生兒望長成兒長吾已老自謂百事足詎知天橫早  
兒童搜故書頗獲見遺稿文思顧葳蕤曲折未探討  
豈羨長吉名仍企酈炎好造物忌瓌奇成性返靈灑  
一讀旣一悲千讀則千悞倘假十年齡尚齊聖哲造  
元理杳莫測吾欲問穹昊

兒氣甚宏達少有丈夫容博識物豈眩逸思若風從  
俯仰鮮中詘奮迅有孤蹤苟能假天命鬱爲今詞宗  
顧我忝明德神理奪所鍾英物且凋喪况云痴與庸  
豈無子夏戚尚虞用昭凶緒餘今似君煩將附秦雍



寄太微

太微神仙人佳思逐雲上揮洒乾坤珍飄颻出塵鞅  
遊宦建章宮才名藉方仰萋斐反南山閉門却交往  
我東遊華峰每過時臨訪麾塵話羲皇拂劍悲魍魎  
或詣少微原歌嘯歷蒼莽倚坐看雲生策杖聽泉響  
遐矚遠不隔幽抱近彌想以茲酬宿心晨夕共歡賞  
別來忽五月予衰殊非曩百憂結我腸許過約恆爽  
夢寐時見之太息誚欺罔新霽起微涼何不謝紛攘  
示孫逸人

昔遇王子喬謂君有仙骨遨遊三島中萬里一超忽  
朝餐石門霞莫吸海陵月朱顏浥瑤輝長樂安可歇  
天上降元鶴白日昇玉闕懶答麻姑書况肯事干謁  
我雖不適意逢君欲飛越

郿塘初浴

憶昔己卯春曾與涇野約因訪岐東君於茲其行樂  
登山矚岐雍臨池事澡淪于時多雜人穢氣遠相搏  
微憇古祠下魂魄若銷鑠斜陽且啣山亟去步未却  
鼃勉宿橫渠是意竟荒落棄置至壬午來自郿東郭  
賴有王李曹先驅爲充拓泉水煖且瑩一湯百疴掠  
始信靈物佳翻嫌表章畧今此復臨池神思益恢擴



瑩徹一如昔清淨宛非昨形暢意轉新神適喜如躍  
嗟哉華清宮安能與之若作詩告後來此地不可薄

和六甥石室納涼二首

錄一首

老境百慮息所好在山林况此洞室闕塵氛安可侵  
開簾見芳碧迤邐聞鳥禽因之感宿好笑歌梁甫吟  
丈夫志四海何人識此心所以夷與惠曠世懷高襟  
日夕涼風發逸興拂西岑沽酒共斟酌慚無絲竹音  
掃石卧煙霧聽子廣陵琴

大士贈任主事少海

山居二十年未見蓬萊客秋莫邂逅君文彩甚彪赫  
因讀沁安策所擬胎不隔西遊遇中道探囊出素  
瓊瑰射人目殊會杳今昔再拜覩宸章炳爍照光室  
歎君英妙時丁此滂沛澤宛如聞都俞依稀見傳說  
握手私謂君丈夫志已獲尚宜踐所陳與世為表格

尹之先畫竹

虛堂挂翠筠玉濤滿壁起知君徹骨清志意特欣此  
興劇須我題予好亦若爾回視桃李姿穠芳胡足齒

天風送尹員外之先

昔逢華陽君云為五帝使檢籙下九州為予泄元秘  
指點峨嵋傍謂有仙人氣仙人尹之先卓犖萬夫賢



吐氣成五色爲世鼓朱絃絕調人莫知徒見春江篇  
予亦遁世者聞之心灑然恨不遂一見相與定艸元  
天風自楚下吹落岐周前相見卽相信今昔誠罕焉  
欸洽苦不久俄赴天子宣餞酒葦門下逸興浩難傳

夢中麓子

積雨晦臯陸我車不可前徘徊望北墅迤邐橫雲烟  
退坐草堂下籬菊燦且妍節物忽將改引杯吟太元  
微醉體亦倦夢謁九華天仙人中麓子揖予出素編  
云是廣成撰孰能叩其筌憶昔魏伯陽謂我骨當仙  
苦逐世人好落魄武亭川緣業殆將滿數命或有然  
因讀沁安策所擬脗不隔西遊遇中道探囊出素冊  
瓊瑰射人目殊會杳今昔再拜覩宸章炳燦照光宅  
歎君英妙時丁此滂沛澤宛如聞都俞依稀見傳說  
握手私謂君丈夫志已獲尚宜踐所陳與世爲表格

尹之先畫竹

虛堂挂翠筠玉濤滿壁起知君徹骨清志意特欣此  
興劇須我題予好亦若爾回視桃李姿穠芳胡足齒  
昔逢華陽君云爲五帝使檢籙下九州爲予泄元秘  
指點峨嵋傍謂有仙人氣仙人尹之先卓犖萬夫賢



吐氣成五色爲世鼓朱絃絕調人莫知徒見春江篇  
子亦遁世者聞之心灑然恨不遂一見相與定艸元  
天風自楚下吹落岐周前相見卽相信今昔誠罕焉  
歎洽苦不久俄赴天子宣餞酒葦門下逸興浩難傳

夢中麓子

積雨晦臯陸我車不可前徘徊望北墅迤邐橫雲烟  
退坐草堂下籬菊燦且妍節物忽將改引杯吟太元  
微醉體亦倦夢謁九華天仙人中麓子揖予出素編  
云是廣成撰孰能叩其筌憶昔魏伯陽謂我骨當仙  
苦逐世人好落魄武亭川綠業殆將滿數命或有然

始思飲刀圭却老覓長年語旣執我手歡笑極周旋  
振袖出兩藥光如朝日鮮挹彼松露下同吞各一圓  
五內脩清爽神采非昔焉我居太白下君廬太山巔  
采芝拾瑤草食玉茹并蓮欲會但瞬息跨鶴何翩翩  
赤松作參伍玉女侍几筵翛然萬物表世網安可牽

雜興

澣西亦佳勝日日有襟期田園俯川陸葵藿滿堦埤  
野叟遺濁醪嘉樹過涼颺微曛上崇巘遐眺引東菑  
牧笛風外來圍禽鳴別枝睡足發新懷此心誰得知

觀魚梁



直西漳川水水煖有魚游僮僕值農隙揭梁漳川頭  
壓石作澗溜刺目避湍流欲辭餌鉤急反爲曲薄留  
願爲梁上死不作餌中收梁上死何惜所畏餌中羞

潼關早發

早發潼關道微風動林木長峽百里去我行正僕僕  
大風變頃刻萬里慘以逐樹杪聞過沙何須問平陸  
我口不可開我身只匍匐輓車兩少年行行亦長哭  
云是闕鄉人先世有官祿縣官急邊糧十戶九逃伏  
里長利賂錢我故苦獨速太平作男兒庸調天亦福  
所恨身不長筋力易羸感母寡已十年蕭條但空櫝  
有田不得畊有事在忽倏近歲嚴轉輸使者日三復  
迢迢百里途如歷經緯軸我喉亢如火我行迅如翻  
吏來督我行躍馬恨不駑使者討押錢鞭撻褫我服  
我冤向孰陳我淚向天瀑語終心益傷聲吞色猶慙  
我感少年語涕泪泣如漉皇明百年來萬姓各安育  
草木亦有滋少年爾曷應匈奴二三載驕氣如鸚鵡  
主將小兒行焉能辦鏃鏃爾居見爾難不見九邊族  
一夫八人管剝削盡膏肉往者禁軍出人家無完畜  
膂力代出役瘁徹內供穀土炕亦見奪何況妻與僕  
此本亡賴子亡命入軍牘三帥皆詭隨安知有鈴束



少年爾莫苦主上正恭穆行當致雍熙邊庭永安肅  
爾身當不勞爾家亦永復少年感我言再拜向天祝  
願主萬年壽保我有饘粥願民如春草長養無踐殞  
輓車向西去氣色猶睦睦

早木同段德光夜酌

白日西南馳人生直如寄芳林春風發百物暢以萃  
君心諧金石良晤成斯醉于焉靡歡洽倏忽老將至  
孔跖今安存何須辨真偽

邑後學

張廷梅與松

校字

孫熒午卿



